

Na osnovu člana 66. Statuta UNIQA Osiguranja d.d. Sarajevo broj OPU-IP 193/2011 od 30.03.2011. godine, odredaba Zakona o društvima za osiguranje u privatnom osiguranju F BiH i člana 7. tačka 1. Odluke o dokumentima koji se prilažu uz zahtjev za izdavanje odobrenja za rad (Sl.novine FBiH 31/09) Uprava Društva dana 18.02.2015. godine d o n o s i:

Dopunske uslove za osiguranje gubitka prtljaga korisnika kreditnih kartica

Član 1.

Opće odredbe

(1) Opći uslovi za osiguranje gubitka prtljaga korisnika kreditnih kartica i ovi Dopunski uslovi za osiguranje gubitka prtljaga korisnika kreditnih kartica (u daljem tekstu: Dopunski uslovi) sastavni su dio ugovora o osiguranju gubitka prtljaga korisnika kreditnih kartica kojeg ugovarač osiguranja zaključuje sa UNIQA Osiguranjem d.d. Sarajevo (u daljem tekstu: Osiguravač).

Član 2.

Osiguravajuće pokrivanje

- (1) Osiguranje prtljaga za vrijeme puta u inoanstvo, kao i za vrijeme boravka u određenoj putovanja pokriva gubitak, oštećenje ili uništenje prtljage koja se nosi sa sobom kao i predate prtljage.
- (2) Prtljagom koja se nosi sa sobom smatra se prtljaga koju osiguranik tokom prevoza u inostranstvo neprestano ima uz sebe.
- (3) Predanom prtljagom smatra se prtljaga koja je predana na čuvanje transportnom društvu, društvu za pružanje usluga smještaja ili koja se nalazi u spremištu za čuvanje prtljage.
- (4) Osiguranjem je pokriven gubitak, oštećenje ili uništenje prtljage koja se nosi sa sobom ili predate prtljage zbog:
 - 1) krivičnog djela treće osobe (npr. krađa, razbojništvo),
 - 2) nezgode prevoznog sredstva (npr. saobraćajne nezgode),
 - 3) požara i elementarnih nepogoda.
- (5) Osiguranjem je pokriven gubitak i oštećenje prtljage predane prevozniku. Osiguranjem je pokriveno i zakašnjenje prtljage predane prevozniku, ako je to kašnjenje duže od 12 sati. U tom slučaju osiguraniku se isplaćuje 100,00 KM za troškove osnovnih stvari.

Član 3.

Početak i trajanje osiguranja

- (1) Obaveza Osiguravača za svako pojedino putovanje počinje onoga dana kada osiguranik pođe na put, ali ne prije nego što osiguranik pređe državnu granicu pri izlasku iz Bosne i Hercegovine.
- (2) Obaveza Osiguravača za svako pojedino putovanje prestaje onoga dana kada osiguranik pređe državnu granicu na povratku u Bosnu i Hercegovinu.

Član 4.

Isključenja i ograničenja obaveza Osiguravača

- (1) Nakit, video oprema i foto oprema i prenosiva osobna računala osigurani su samo ako se nose sa sobom, ali samo do trećine ugovorene sume osiguranja. Ako se nalaze u predatoj prtljazi, navedeni predmeti ni u kojem slučaju nisu osigurani.
- (2) Prtljaga na parkiranom vozilu osigurana je od krađe, samo ukoliko se nalazi u zaključanom tvorničkom krovnom nosaču opreme.
- (3) Novac, vrijednosni papiri, putne karte i dokumenti svih vrsta nisu osigurani.
- (4) Sportska oprema osigurana je samo za vrijeme prevoza do i od određena putovanja, te u turističkom smještaju u zaključanoj prostoriji, ali ne i za vrijeme upotrebe.
- (5) Osiguravač je oslobođen obaveze isplate štete ako je osiguranik namjerno ili iz grubog nemara prouzročio osigurani slučaj ili kada prilikom nastanka osiguranog slučaja, osobito u prijavi štete, namjerno navede neistinite podatke.
- (6) Osiguravač je oslobođen obaveze isplate štete nastale zbog gubitka, oštećenja ili zakašnjenja u prevozu prtljage predate prevozniku, osim u slučaju kada osiguranik dokaže da naknadu nije mogao ostvariti od prevoznika.

Član 5.

Prijava osiguranog slučaja

- (1) Osiguranik je obavezan odmah po nastanku štetnog događaja bez odgađanja prijaviti štete nastale zbog krivičnih djela treće osobe nadležnoj ili najbližoj policijskoj stanici. Policijski zapisnik s popisom svih izgubljenih ili oštećenih stvari treba dostaviti Osiguravaču zajedno s pisanom prijavom štete najkasnije u roku 30 (trideset) dana od dana nastanka osiguranog slučaja.
- (2) Štete na predatoj prtljazi moraju se odmah bez odgađanja prijaviti prevozniku ili organizaciji koja pruža usluge smještaja. Potvrda o šteti izdata od nadležnog preduzeća mora se dostaviti Osiguravaču zajedno s pisanom prijavom štete najkasnije u roku 30 (trideset) dana od dana nastanka osiguranog slučaja.

Član 6.

Obaveza Osiguravača

- (1) Osiguravač je obavezan isplatiti po štetnom događaju, a najviše do ugovorene sume osiguranja, sljedeće naknade:
 - 1) za izgublenu prtljagu, novonabavnu vrijednost stvari umanjenu za iznos amortizacije (iznos izgubljene vrijednosti zbog starosti ili istrošenosti);
 - 2) za oštećene stvari, nužne troškove popravka, ali najviše do novonabavne vrijednosti stvari umanjene za iznos amortizacije,
 - 3) za uništene stvari novonabavnu vrijednost stvari umanjenu za iznos amortizacije i procijenjeni iznos ostatka,
 - 4) stvari za filmove, nosače slike, zvuka i podataka, vrijednost materijala.
- (2) Ako su osigurane stvari potpuno uništene ili ukradene, a osiguranik ne može dokazati njihovu vrijednost, Osiguravačeva je obaveza najviše do 50% od novonabavne vrijednosti stvari.
- (3) U slučaju štete na prtljazi koju osiguranik nosi sa sobom, Osiguranik sudjeluje u šteti s iznosom od 50,00 KM po štetnom događaju.

Član 7.

Primjena Dopunskih uslova

- (1) Ovi Dopunski uslovi vrijede uz Opće uslove za osiguranje korisnika kreditnih kartica, a ukoliko su u suprotnosti sa sadržajem Općih uslova, vrijede ovi Dopunski uslovi.

Ovi Dopunski uslovi za osiguranje gubitka prtljaga korisnika kreditnih kartica usvojeni su Odlukom Uprave Društva broj 0000-000011-112014/V.1, a primjenjuju se danom izdavanja saglasnosti Agencije za nadzor osiguranja FBiH.